

**■ GLOSSA**

# Cumprà da bov, mangià da chaval

DA SILVIO CAMENISCH

Cumprà da bov, mangià da chaval, da quai na dessi betg en nossa mazlaria pitschna! Nossa pitschna ha adina offrì ed era vendì ad ina clientella fitg affidada mo fitg buna charn. En nossa mazlaria pitschna, respectiva pitschna mazlaria è gea er egual, avain nus in fitg fitg aut nivel da qualitad. Quai ans essan nus la valita. Noss manaschament da qualitad e cumpetenzas sa lascha vesair sin il product. Guardai mo, chara clientella, tge bella charn.

U schè bella charn fa gust per dapli. Quella bella bella charn, uschè unica e bella ma fa dar giu la liva gia qua en stizun Lozza u Plozza. Has per mai in fazelet tempo, mieur? Super. Betg gist favuraivel, bunamain laschar dar giu la liva en bucca qua en stizun ed ina clientelluna che spetga da vegnir vidlonder. Jau manegel ofrida e servida sco quai ch'ella avess gugent. Facit intermediar: È cuntenta nossa fitg affidada clientella, perfin cuntentada ch'è anc ina zacca dapli, essan nus automaticamain era.

Nus ans auzain ed urain ussa da cuminanza: En noss vegl manaschi da famiglia, nossa pitschna mazlaria locala, è



il product charn anc vaira charn. Da la regiun, per la regiun. Prendai e mangiai tuts e tuttas da quella vaira charn, quella è bella gia da vesair. Il bel, das Schöne, n'è betg adina uschè unic bel da vesair, cunzunt betg tar la charn! Qua u là vesa l'um u uschiglio partenari da maisa e letg nagliur bella charn pli, cur ch'ella turna da l'institut da bellezza. Bain vegnida en fauss mauns ed a mauns da la mafia da charn, la bella chara ussa maltgierta sco il putgà liebe Sünde!

Nossa mazlaria pitschna da chasa venda mo buna charn al consument e la consumenta. Nagut da quai da bacterias listerias u chaussas nunvairas en nossa charn. Nossa charn è en urden, so, quella di la vardad era sch'ella n'è betg adina da vesair l'emprimument per mai sco consument, cartent, navair. La

vardad po era sa zuppar en mazlaria, navair. Quella charn uschia insatge da carugna po manar il consument naiv innocent per il nas. Quai plascha uss al nas da vegnir manà enturn uschia, quai en stizun lura a chasa, da la unica bella charn, la carugna.

Cumprà da bov, mangià la fin finala da chaval na datti betg tar nus! Betg en la charn e betg en la litteratura. La mafia da charn e da la cultura e litteratura na datti betg tar nus. Qua essan nus mitschads bain quella giada. Nus s'auzain e schain puspè da cuminanza: Tgi che mangia da quella charn, mangia da quella anc pli giadas. Listerias bacterias u tgeninas betg en quella charn. Nus avessan charn d'acziun per pretsch da rir, da sbragir gist per las festas da Nadal, ch'han gia lieu en tuttas mazlarias pitschnas e grondas.

Ah, fai uschia, vai anc. Pervia d'avair cumprà da bov, mangià da chaval e listerias en voss fondue bourguignonne a discretion cun voss um, vossa dunna tgi adina, na fa bain betg murir! Quai è era Nadal sco quai che nus avain siemià adina. Alura avevas avant insatge betg en urden, cun la charn. Qua na s'empo la charn sezza nagut, la charn.